

खबरां

- प्रधानमंत्री नरेंद्र मोदी होरें आर्थिक सहयोग गी बढ़ावा देने लेई रोम च अपनी इटली दी हमरूतबा जार्जिया मेलोनी हुंदे नै वार्ता कीती।
- प्रधानमंत्री नरेंद्र मोदी ते इटली दी उंदी हमरूतबा जार्जिया मेलोनी कन्नै भारत-इटली रणनीतिक सांझेदारी लेई रोडमैप दी रूप-रेखा प्रस्तुत कीती, इक संयुक्त लेख च केई आर्थिक पैहलें पर लोहू पाई।
- डी.आर.डी.ओ नै ड्रोन आसेआ दागी जाने आहली मानवरहित सटीक निर्देशित मिसाइल दा परीक्षण पूरा कीता।
- सुप्रीम कोर्ट नै केंद्र सरकार दे जाति गणना करने दे फैसले गी चुनौती देने आहली याचिका खारिज करी दिती ऐ।
- उत्तर ते मध्य भारत च भीषण गर्मी दी लहर चला'रदी ऐ, केई थाहें पर तापमान 44 डिग्री शा पार पुज्जी गेआ ऐ।
- आई.पी.एल क्रिकेट च मेजबान कोलकाता नाईट राइडर्स दा मुकाबला इडनगार्डन च मुम्बई इंडियन्स कन्नै होगा।

<><><><><><>

PM-Italy Visit

प्रधानमंत्री नरेंद्र मोदी होरें अज्ज रोम च इटली दी प्रधानमंत्री जार्जिया मेलोनी हुंदे कन्नै प्रतिनिधिमंडल स्तर दी वार्ता कीती, जेदा मकसद प्रमुख क्षेत्रें च भारत इटली दपक्खी सरबंधें गी होर मजबूत करना ह। बैठक च बपार, निवेश, प्रौद्योगिकी, रक्षा, स्वच्छ उर्जा ते रणनीतिक सांझेदारियों च सहयोग बढ़ाने पर जोर भरेआ। दौनें नेताएं पारस्परिक हित दे क्षेत्रीय ते वैश्विक घटनाक्रमें पर बी चर्चा कीती। वार्ता च भारत ते ईटली बश्कार बददी रणनीतिक सांझेदारी झलकदी ऐ जेदे च आर्थिक सहयोग ते जन सरबंधें दे विस्तार पर बल दित्ता गेआ ऐ। मोदी होरें भारत यूरोप सरबंधें गी मजबूत करने लेई इटली दे समर्थन दी सराहना कीती ते उभरदी प्रौद्योगिकियों, विनिर्माण ते सतत विकास कन्नै सहयोग दे महत्व पर लौहू पाई।

<><><><><><>

India-Italy Ties

हाल दे बरें च भारत इटली सरबंधें च अभूतपूर्व गति कन्नै विस्तार होआ ऐ ते हुन एहू इक निर्णायक मोड़ पर पुज्जी गेआ ऐ। प्रधानमंत्री नरेंद्र मोदी ते उंदी इटली दी हमरूतबा जार्जिया मेलोनी आसेआ लिखित इक संयुक्त लेख च दौनें नेताएं इस गल्ला पर लौ पाई जे दौनें देशें बश्कार सरबंध सौहार्दपूर्ण मित्रता कन्नै विकसित होइयै इक विशेष रणनीतिक सांझेदारी च तब्दील होई गे न जेडा स्वतंत्रता, लोकतंत्र ते भविष्य लेई सांझा दृष्टिकोण दे मूल्लें पर आधारित ऐ। नेताएं आखेआ जे ऐसे समें च

जिसले वैश्विक बवस्था च गहन परिवर्तन होआ'रदा ऐ, भारत इटली सांझेदारी गी उच्चतम राजनीतिक ते संस्थागत स्तरें पर नियमित आदान-प्रदान कन्नै निर्देशित कीता जा'रदा ऐ। उनें आखेआ जे दौनें देशें दी आर्थिक गतिशीलता, सामाजिक रचनात्मकता ते सदियें परानी सभ्यतागत ज्ञान दे संयोजन कन्नै सांझेदारी इक नमां आयाम हासल करा'रदी ऐ।

<><><><><><>

Trump G-7 Summit

अमरीका दे राष्ट्रपति डोनाल्ड ट्रम्प होर अगले म्हीने फ्रांस च आयोजित होने आहली जी-7 शिखर सम्मेलन च शामिल होडन। पच्छिम एशिया संघर्ष गी लेइयै अमरीका ते केई यूरोपीय सहयोगियें बश्कार बददे तनाव बश्कार ट्रम्प इस सम्मेलन च शामिल होडन। व्हाइट हाउस दे इक अधिकारी दे मताबक दक्खन पूर्वी फ्रांस दे इवियन लेस बैस च 15 थमां 17 जून धोड़ी होने आहले इस शिखर सम्मेलन च ए.आई, बपार, महत्वपूर्ण खनिज, विस्थापन ते वैश्विक सुरक्षा जनेय मुद्दे पर चर्चा होगा।

<><><><><><>

DRDO

देश नै आत्मनिर्भर भारत पैहल दे तैहत स्वदेशी रक्षा क्षमताएं गी मजबूत करने दी दिशा च इक होर महत्वपूर्ण उपलब्धि हासल कीती ऐ। रक्षा अनुसंधान ते विकास संगठन डी.आर.डी.ओ नै अनमैंड एरियल व्हीकल लॉन्च वी-3 दे अखीरी विकास परीक्षण गी सफलतापूर्वक पूरा करी लैता ऐ। एहू देश दे रक्षा क्षेत्र लेई इक महत्वपूर्ण उपलब्धि ऐ।

<><><><><><>

Rajnath DRDO

रक्षा मंत्री राजनाथ सिंह होरें यू.एल.पी.जी.एम.वी-3 मिसाइल दी कामयाब विकास अजमैशें लेई रक्षा अनुसंधान ते विकास संगठन डीआरडीओ, सार्वजनिक क्षेत्रें दे उपक्रमें, रक्षा उत्पादन दे भ्यालें ते उद्योग जगत दी सराहना कीती ऐ। उनें टैंक रोधी भूमिका लेई ब्हा थमां जिमी पर ते ड्रोल हैलीकाप्टर ते होरनें ब्हाई लक्ष्यें लेई ब्हा सवां ब्हा च मार करने दी एहदी छमता बारै तफसीली जानकारी हासल कीती ते कन्नै सिफत बी। रक्षा मंत्री होरें इसी रक्षा क्षेत्र च भारत दी आत्मनिर्भरता दी दिशा च इक महत्वपूर्ण रणनीतिक उपलब्धि करार दित्ता।

<><><><><><>

SC-Census

सुप्रीम कोर्ट नै जनगणना 2027 तैहत जाति गणना कराने दे केंद्र सरकार दे फैसले गी चुनौती देने आहली याचिका गी अज्ज खारिज करी दित्ता ऐ। अदालत नै आखेआ जे एहू मुद्दा सरकार दे नीतिगत अधिकार क्षेत्र च आंदा ऐ। मुख न्याधीश सूर्यकांत दी अध्यक्षता आहली पीठ नै आखेआ जे पिछड़पे वर्गें दे कल्याणकारी उपाय तैयार करने लेई सरकार गी उंदी संख्या जानना जरूरी ऐ।

<><><><><><>

Census

जम्मू-कश्मीर च 2027 दी मरदमशुमारी तैहत आपूं अपनी जानकारी दर्ज करने दी प्रक्रिया शुरू होए दे पैहले त्रै दिनें च गे डेढ लक्ख कोला मते लोकें डिजिटल सर्वे तैहत अपने बारै जानकारी आनलाइन दर्ज कराई लैती ऐ। स्टाडे संवाददाता नै अधिकारिएं दे हवाले कन्नै खबर दिती ऐ जे ग्रामीण ते शैहरी दौनें इलाकें थमां लोकें दी जबरदस्त प्रतिक्रिया हासल होआ करदी ऐ। एह प्रतिक्रिया 31 मई धोड़ी जारी रौहग ते खानाबदोश गुज्जर बकरवाल समुदायें गी इस प्रक्रिया च शामिल करने लेई बी विशेष प्रबंधन कीते गेदे न। अधिकारिएं दा आखना ऐ कि एह प्रक्रिया पूरी चाल्ली निजी, गुप्त ते सुरक्षित ऐ ते एहदे राएं लोकें दी माली स्थिति जां बैंक खातें दे बारै च कोई जानकारी किट्टी नेई कीती जंदी। एह भारत दा पैहला, पूरी चाल्ली डिजिटल मरदमशुमारी होग।

<><><><><><>

Railway-Fire

देश दे बक्ख-बक्ख हिस्सें च रेल गड्डियें च अगग लगगने दी हालिया घटनाएं दी जांच च केई मामलें च असमाजी तत्वें दा हत्थ होने दा पता लग्गा ऐ। सूत्रें मूजब रेलवे नै इनें घटनाएं गी बड़ी संजीदगी कन्नै लैता ऐ ते रेलवे सुरक्षा बल मामलें दी गैहराई कन्नै जांच करा करदा ऐ। राजस्थान दे अनरपुरा स्टेशन कश अगग लाने दी इक घटना च इक बेपंछानू आदमी नै रेल गड्डी दे डब्बे अंदर कपड़ें च अगग लाने दी कोशश कीती जेदे नै अगग लग्गी। हावड़ा च इक बक्खरी घटना च अगग लग्गी दी रेल गड्डी दे बाथरूम च पेट्रोल कन्नै सेडे दा इक कपड़ा लब्बा हा। इसै चाल्ली राजस्थान दे कोटा च बी राजधानी एक्सप्रेस च लग्गी दी अगग दी शुरूआत बाथरूम आहले पाससै दा होई। तोआई बिहार दे सासाराम च एह घटना खााली ट्रेन च होई जित्थे कोई जरनेटर या ऐसी कोई चीज नेई ही जेड़ी अगग फगड़ी सकदी ऐ। भारती रेलवे नै अग लगगने दी हालिया घटनाएं गी ध्यानै च रखदे होई यात्रिएं दी सुरक्षा यकीनी बनाने लेई अपनी बचनबद्धता पक्की करदे होई आखेआ कि एह अमरपुरा दे हावड़ा दिएं घटनाएं च रेलवे कर्मचारिएं तुरत कार्रवाई करदे होई बड्डे हादसें गी टाली दित्ता ऐ।

<><><><><><>

PIB-Factcheck

सरकार नै सोशल मीडिया पर चलै करदी उस खबर दा खंडन कीता ऐ जेदे च दावा कीता गेदा ऐ कि जम्मू-कश्मीर दे गांदरबल च कश्मीरी लड़ाकें भारी फौज दी इक गड्डी पर हमला कीता जेहदे च केई भारती फौजी मारे गे न। पत्र सूचना ब्यूरो पीआईबी दी तत्थें दी जांच करने आहली इकाई नै दस्सेआ ऐ कि ऐसी कोई घटना पेश नेई आई ऐ ते खबर पूरी चाल्ली झूठी ते बेबुनियाद ऐ। इकाई नै लोकें अगगे अपील कीती ऐ कि इस चाल्ली दी कोई बी खबर विजन परखे नां गै कुसै गी फारवर्ड करन ते नां गै ओहदे पर जकीन करन।

<><><><><><>

IMD

भारती मौसम विज्ञान विभाग नै इस हफ्ते उत्तर पच्छिम ते मध्य भारत च भीषण लू चलने दी भविक्खवाणी कीती ऐ। विभाग दे मताबक अगले 4 दिनें धोड़ी दिल्ली, पंजाब, हरियाणा, चंडीगढ़, ओडिशा, छत्तीसगढ़, राजस्थान, तेलंगाना ते उत्तराखंड च लू चलने दी मेद ऐ। असम, मेघालया,

केरलम, माहे उपहिमालयी, पच्छिम बंगाल, सिक्किम, तमिलनाडू, पुदुचेरी, कराईकल ते अंडमान ते निकोबार द्वीप समूह च कल धोड़ी भारी बरखा होने दी मेद ऐ।

<><><><><><>

Rajnath South Korea

रक्षा मंत्री राजनाथ सिंह होरें अज्ज सियोल च दक्खन कोरिया दे रक्षा मंत्री आन ग्यू बैक कन्नै मलाटी कीती। दौनें नेताएं क्षेत्रीय शांति, स्थिरता ते तकनीकी सहयोग च सांझी प्रतिबद्धता व्यक्त कीती। उनें भारत दक्खन कोरिया रक्षा, रक्षा उद्योग ते रणनीतिक सहयोग गी होर मजबूत करने पर चर्चा कीती। सोशल मीडिया पोस्ट च श्री सिंह होरें आखेआ जे इस अत्यंत उपयोगी बैठक च दौनें देशें रक्षा साइबर सहयोग गी बढ़ावा देने लेई समझौते दा आदान-प्रदान कीता। एहू समझौता ज्ञापन भारत दे राश्ट्री रक्षा महाविद्यालय, कोरिया राश्ट्री रक्षा विश्वविद्यालय ते संयुक्त राश्ट्र शांति स्थापना सहयोग बशकार होआ। रक्षा मंत्री होरें आखेआ जे ओहू दौनें देशें बशकार विशेष रणनीतिक सांझेदारी गी मजबूत करने लेई उत्सुक न।

<><><><><><>

Congo-Ebola

कांगो च इबोला वायरस दे प्रकोप करी मरने आहलें दी गिनती बढियै 136 होई गई ऐ। सोआस्थ मंत्री रोजर काम्बा होरें एहू जानकारी दित्ती। कांगो दे सोआस्थ अधिकारिणें मताबक देश च 543 संदिग्ध मामले ते 32 पुष्ट संक्रमण दर्ज कीते गए न। गोआंडी देश युगांडा च दो मामलें दी बी पुष्टि होई ऐ।

<><><><><><>

Bangladesh Officer Dead

बांगलादेश दे चटोग्राम च भारती सहायक उच्चायोग दे इक सहायक सुरक्षा प्रोटोकाल अधिकारी कल बडुलै खुलशी इलाके च दूतावास परिसर च मृत पाए गए। पुलिस नै दस्सेआ जे मृतक दी पंछान 35 बरें दे नरेंद्र दे रूपै च होई ऐ। ओहू हरियाणा दे निवासी हे ते चटोग्राम स्थित भारती दूतावास च कार्यरत हे।

<><><><><><>

China-Russia Talks

चीन दे राश्ट्रपति शी जिनपिंग ते रूस दे राश्ट्रपति व्लादिमीर पुतिन नै अज्ज बीजिंग च दपक्खी सरबंधें, ईरान यूक्रेन संघर्ष ते अंतरराश्ट्री बपार सने प्रमुख वैश्विक मुद्दें पर गल्लबात कीती। चीन दे विदेश मंत्रालय नै आखेआ जे वार्ता कन्नै बीजिंग ते मास्को बशकार रणनीतिक सांझेदारी गी मजबूत थ्होग ते संयुक्त राश्ट्र, दक्खन अफ्रीका परिषद ते ब्रिक्स जनेय मंचें दे राणें समन्वय बदोग। दौनें देशें बपार, उर्जा ते सुरक्षा च बढदे सहयोग पर बी लौहू पाई जेदे च दपक्खी बपार 200 अरब अमरीकी डालर थमां मता होई गेआ ऐ। एहू बैठक अमरीकी राश्ट्रपति डोनल्ड ट्रम्प हुंदी चीन यात्रा दे किश गै समें बाद होई जित्थे उनें शी जिनपिंग कन्नै क्षेत्रीय ते वैश्विक घटनाक्रम पर चर्चा कीती ही।

<><><><><><>

IPL

आई.पी.एल क्रिकेट च अज्ज कोलकाता नाइट राइडर्स दा मुकाबला इडनगार्डन च मुम्बई इंडियन्स कन्नै होगा। एह मैच संजा साङ्गे 7 बजे खेडेया जाहगा। एह्दे थमां पैहले कल रातीं जयपुर च राजस्थान रॉयल्स नै लखनऊ सुपर जायंट्स गी 7 विकट कन्नै हराई दिता। एदे कन्नै राजस्थान दी प्ले ऑफ च पुज्जने दी संभावना बनी दी ऐ।

<><><><><><>

LG-App. Letters

उपराज्यपाल मनोज सिन्हा होरें अज्ज जम्मू दे गुलशन ग्राउंड च आयोजित इक कार्यक्रम दरान जम्मू-कश्मीर पुलसै च नमें भर्थी होर 100 पुरूष ते महिला कांस्टेबलें गी नियुक्ति पत्तर सौंपे। इस मौके किट्ट गी संबोधित करदे होई एल.जी होरें जम्मू-कश्मीर पुलसै दी सराहना करदे होई आखेआ कि एह बल पिछले 30 बरें दरान तेजिया कन्नै बदलदी सुरक्षा ते कनून बवस्था सरबन्धी चुनौतिएं कन्नै निब्बड़ने लेई अपने आपै च उसै स्हाबै तैयार करियै इंदे पूरी तगडेयाई कन्नै मकाबला करै करदा ऐं उनें आखेआ जे नमें भर्थी होए दे कांस्टेबलें बी इसै दलेर ते समर्पित परम्परा गी अगड़े लेई जाने लेई जम्मू-कश्मीर पुलस च शामिल होने दा मन बनाया ऐ ते मेद प्रगट कीती जे अपनी निष्ठा, इमानदारी ते पेशेवराना रौं एह लोक अपनी जिम्मेवारिएं गी अंजाम देंगन। एल.जी होरें आतंकवाद दा समूलचा नाश करने लेई बक्ख-बक्ख सुरक्षा एजेंसिएं बश्कार नेडमें तालमेल दी जरूरत पर जोर दिता।

<><><><><><>